

LETTRE

D'VN VERITABLE

FRANÇOIS,

A MONSEIGNEVR

LE DVC

D'ORLEANS.



A PARIS,

M. DC. XLIX.

LETTRE

D'UN VÉRITABLE

FRANÇOIS

A MONSIEUR

LE DUC

DORLEANS



A PARIS

DE LA VILLE



LETTRE D'VN VERITABLE FRANCOIS,
à Monseigneur le Duc d'Orleans.

MONSEIGNEVR,

S'il est vray que ce soit vne coustume inuiolable parmy les peuples de reclamer la puissance des Dieux tutelaires, lors qu'il s'agist du salut de la republique. Je ne puis que ie ne m'estonne de ce que parmy tant de desordres qui trauiillent la France, & tant de dangereuses conuulsions dont elle est desfiguree, il n'y ait eu encore personne qui ait imploré le secours de vostre A. R. bien que ce soit elle qui dans la minorité de nostre Monarque, tienne entre ses mains les destinées de ce florissant Estat. Ne seroit-ce pas peut-estre qu'on ait apprehendé que vous fussiez semblable à ce Iupiter de Crete, qui n'estoit point touché des calamitez publiques, & qui faisoit gloire d'estre sourd aux plaintes & aux gémissemens de ceux qui se prosternoient aux pieds de ses Autels. mais certes, ces craintes seroient iniustes & ces desffiances criminelles, puisque vous avez desia donné à la France d'assez puissantes preuues de vostre amour & de vostre bonté: lors que prodiguant vostre vie pour sa gloire, vous avez humilié l'orgueil de vos ennemis, & moissonné mil Lauriers dās leurs Prouinces plütoſt pour luy en faire vne Courōne, que pour seruir d'ornement à vostre triomphe. Grauelines, Courtray & tant d'autres places, ont esté le champ dans lequel vos armes victorieuses vous ont frayé le chemin, a tant de belles & d'honorables conquestes: & ces Villes audacieuses vous ont ouuert autant de portes triomphales, qu'elles auoient souffert de breches & de ruines. Enfin vostre valeur a fait voir à la Flandre que vous estiez vn digne heritier des heroïques vertus de Henry le Grād, & que vous auiez heureusement pris pour principe de vos actiōs celuy qui l'estoit de vostre vie. Mais quoy, MONSEIGNEVR, tous ces illustres trophées, ces riches montemens d'honneur qui estoient desia placez dans le Temple de l'Immortalité, ne donnent plus que de l'estonnement au lieu d'admiration: vos

dernieres actions ont obscurcy leur splendeur & souillé leur esclat: & la renommee qui sembloit n'auoir pas assez de bouches pour publier vostre gloire, est demeuree sur ce suiet muette, & n'a plus de voix que pour apprendre à tout l'Vniuers que vous auez quitté le nom de pere de la patrie pour prendre celuy de persecuteur. En effet, que dira la posterité (elle qui iuge sans peur des actions des Princes) lors qu'elle sçaura que V. A. R. a tourné ses armes cōtre celle, que elle auoit si souuent courōnée & qu'elle a pris plaisir de teindre ses lauriers du sang des fidelles François, au lieu qu'ils ne deuoient estre arrosez que de celuy de ses ennemis. Elle rougira sans doute, MONSEIGNEVR, aussi bien que le siecle où nous sommes, & elle ne pourra croire qu'avec peine, que vous ayez traouillé à renuerfer vne Couronne a laquelle vous pouuez pretendre par le priuilege de vostre naissance. mais ce qui augmentera encore son estonnement, ce sera lors qu'elle considerera que V. A. R. ne s'est armee que pour la deffence d'un Ministre Estranger, ou plustost du Tyran de la France, qui met les desolations des Prouinces & les supplices des hommes, entre les ornemens de sa bonne fortune; qui opprime les Loix par la violence & estouffe la liberté par l'autorité; qui vsurpe toute la puissance Royale & ne pardonne qu'au seul nom de Roy; & qui enfin comme vn nouveau monstre ne vit que des agonies des peuples & ne boit que leurs larmes. De telle façon, MONSEIGNEVR, que du plus haut point de la liberté où nous estions montez, nous tombons dans le dernier degté de la seruitude; & nous auons ce regret de voir triompher de nos vies & de nos biens vn inconnu, en qui le hazard a esté plus fauorable que la prouidence de ses parens, & en qui la fortune plustost que le merite a releué la bassesse de la naissance. Le Parlement de Paris, MONSEIGNEVR, cette illustre Compagnie qui tient entre ses mains la garde des loix & la tutelle du Royaume, auoit creu qu'il estoit de son deuoir de s'opposer à ces violences, & de prester ses mains à soustenir les ruines qui menaçoient la Monarchie: il a pour ce suiet recours à de tres-humbles remonstrances; il employe tous les mouuemens de l'éloquence & tout ce que l'ardeur de son zele luy peut suggerer, pour rendre sensible la Reyne Regente aux plaintes & aux souffrances de son peuple. Mais il trouue que le Cardinal a desia porté l'endurcissement dans le cœur de cette sage Princesse.

cesse. Tellement qu'on luy impose silence, & on luy oste par ce
 moyen la voix qui estoit la seule consolation qui luy restoit dās
 son infortune. C'estoit trop peu pour les desseins de ce barbare
 Ministre. On s'affeure des plus zelez & des plus courageux de
 ce grand corps : On les arrache du trosne de la iust. ce & du lit
 des Roys, pour les conduire dans des tristes & mal-heureuses
 prisons: sçachant bien que les Loix estoient viuement animees
 par leur parole, & que la iustice se resiouyssoit de se voir en leur
 voix comme en son lustre & en son plus haut appareil. Cette
 violence n'eust point d'autre effet que d'émouuoir les peuples.
 L'amour charitable que la nature leur a graué dans le cœur en-
 uers leur patrie, leur met en vn moment les armes entre les
 mains : Ils ne peuuent souffrir qu'on leur rauisse leurs Peres &
 leurs Protecteurs; & commençans à ne rien plus esperer, ils
 commencent à ne rien plus craindre, & estant pour con-
 seruer leurs vies, non seulement les plus iustes moyens, mais
 encore ceux qui leur semblent les plus assurez. Mais Dieu
 qui preside au gouvernement des Empires, calma en vn instant
 cette effroyable tempeste, & redonna à cette Ville sa premiere
 tranquillité. On commençoit desia de se promettre quelque
 heureux changement dans le gouvernement de l'Estat, lors
 que par vn attentat inouy le Cardinal Mazarin nous desrobe,
 à la faueur des tenebres, l'auguste & sacree personne de nostre
 Prince, & nous despoüille de ce riche tresor que Dieu auoit
 accordé à nos larmes, & qui n'est pas moins le Fils de nos prie-
 res, qu'il l'est des entrailles de nostre vertueuse Reyne.
 Et i'ose dire, MONSEIGNEUR (parce que ie ne sçauois le
 dissimuler) que V. A. R. s'est renduë complice de ce larcin sa-
 crilege, & que vous auez voulu estre rauisseur d'un bien
 dont vous estiez le vray & legitime depositaire. Je sçay bien,
 MONSEIGNEUR, que l'on vous a persuadé que l'execution
 de ce lasche dessein estoit non seulement iuste, mais encore ne-
 cessaire, puis qu'il s'agissoit de la conseruation de la personne
 du Roy qui est à l'Estat, ce que le cœur est au corps humain, le
 Soleil à la nature, le pere à la famille & le pilote au vaisseau.
 Mais il est du sage & iudicieux Prince de connoistre la probité
 de ceux qui le conseillent: parce que d'ordinaire ils cachent le
 mensonge sous les habits de la verité, & n'esleüer leurs fortunes
 que sur les ruines & les debris de la reputation de leurs Mai-

stres. On vous a dit que Paris estoit tombé dans le crime de rebellion ; que le Parlement auoit dessein de marcher sur la teste des Roys, & de se rendre Maistre de cette Monarchie ; & par consequent qu'il estoit necessaire de se servir de l'aspreté du remede, & d'arrester avec le fer cette dangereuse gangrene, auant qu'elle eust le temps d'infecter & de corrompre tout le corps de cét Estat. C'est pour cette raison qu'on vous a fait consentir à l'appeller tant de belles troupes qui estoient destinees pour la conqueste de la Catalogne, à tirer les garnisons des frontieres, & par ce moyen donner en proye tant de riches Prouinces à nos ennemis. Et tout, pour dresser vne puissante armee, afin de reduire Paris à l'extremité, & faire remonter glorieusemēt le C. Mazarin sur le mesme trône dont il a donné tant de loix de sang, & d'où la crainte des supplices sembloit l'auoir fait descendre. On assiege donc cette celebre & fameuse Ville, le Theatre du Monde & le siege de l'Empire François: on rauage la cāpagne: on despoille les Tēples de leurs plus sacrez ornemēs; on change les Villages les mieux peulez en d'effroyables solitudes; on viole les filles aux yeux de leurs parens, & par vne cruauté sans exēple, on fait que le pere assiste aux funerailles de l'honneur de sa fille, & que la fille est spectatrice de la mort de son malheureux pere. Et ce qui me serre encore le cœur de tristesse & de douleur; c'est qu'on dit, M O N S E I G N E V R, que V. A. R. en qui les vertus sembloient combattre pour triompher les vnes des autres, commande elle-mesme les meurtres & les pillages & veut que l'on immole des victimes innocentes à la fureur d'un Ministre Estranger. Enfin on a dessein d'exercer sur Paris tout ce que la plus detestable vengeance pourra inspirer, afin d'intimider les peuples, & de donner de l'espouuante aux autres Villes par l'exemple de sa punition; estant indubitable qu'on ne peut oster la vie au cœur sans l'oster en mesme temps à tous les autres membres. Mais nous esperons, M O N S E I G N E V R, qu'encore que les portes du Ciel soient fermees aux entreprises des hommes, elles seront ouuertes à nos gemissemens, & que Dieu qui ne protege pas moins l'innocence qu'il punit le crime, attachera le bon-heur aux armes du Parlement, & destournera les disgraces & les mal-heurs qui le menacent : qui combat avec iustice combat sans crainte, & qui recherche son salut ne passit point à la veuē

du danger. Et à la verité, la prouidence diuine, cét œil tousiours ouuert, ce Soleil qui ne se couche iamais & qui respand sur les hommes la lumiere de ses graces à mesure qu'ils en ont besoin, a desia pourueu à nostre salut & pris nostre protection. C'est elle qui fortifie le zele du Parlement, qui enflamme les cœurs des Citoyens, qui donne de l'audace aux soldats & qui a fait choix de tant d'illustres Generaux, qui n'ont accoustumé de marcher que sur les trophées, & à qui les champs de batailles sont autant de champs de victoires. Le seul nom de Beau-fort, MONSIEIGNEVR, est capable d'estonner les plus assurez. La terreur va tousiours deuant luy, & il prend les armes avec tant d'assurance, qu'encore que les euenemens de la guerre soient aueugles, toutesfois en luy la seule volonté de combattre est vn gage assuré du triomphe. Mais pendant que Paris se prepare genereusement à la deffence, toutes les Prouinces du Royaume, MONSIEIGNEVR, se souleuent, non pour se soustraire de l'obeyssance de leur Souuerain, mais bien pour se deliurer des fers dans lesquels elles sont il y a long-temps engagees. Les Parlemens mesmes sont liez ensemble d'une telle societé, & par vn si ferme nœud d'amour & de iustice, qu'ils ne font plus qu'un mesme corps, & ie puis dire qu'ils se sont rédus par cette vnion semblables à ce fameux Briaree qui auoit plusieurs bras, mais qui n'estoit animé que d'un seul esprit. Si bien MONSIEIGNEVR, que la France se voit à la veille d'estre déchirée par les mains de ses propres enfans, si V. A. R. ne s'oppose à ce coup fatal & n'arreste les foudres qui de tous costez commencent d'esclater avec violence. Esteignez donc, MONSIEIGNEVR, ce feu intestin qui embraze & qui deuore le dedans de ce Royaume; secourez les loix opprimees, releuez la liberté abbatuë & imitez cét hercule des Grecs, qui fist germer de ses armes vn beau & verdoyant Oliuier. Faites que nous mesurons le cours de la Regence de la Reyne par le nombre des anneés & non pas par la duree de nos maux. Rendez à Paris ce precieus gage, cét aymable Monarque qu'on luy a iniustement enleué: tous ses Citoyens le demandent, & ils souffirent avec tant d'ardeur apres son retour, quil leur semble que le temps a quitté ses ailles, tant il vient lentement à leur gré. Mais sur tout, MONSIEIGNEVR, ne pardônez pas aux crimes de ce traistre Sicilien, qui tient la paix captiue il y a si long-têps.

qui par ses intelligences esbranle la Couronne de nostre Prince & estouffe ses plus belles victoires, & qui d'une main auare & d'un cœur ambitieux, rait & enleue aux familles leurs fortunes, aux armées leurs soldes, aux Magistrats leur puissance, à l'Eglise ses Benefices & aux Princes leur autorité. Et pour acheuer dignement cet ouvrage, faites qu'à l'auenir les Estrangers ne soient plus admis au gouvernement de cet Empire. C'est ainsi que les Triomphateurs de tout le monde ne leur permettoient pas, non plus que les Grecs, d'aspirer aux charges de la republique : sçachans bien qu'ils ne peuvent iamais se despoüiller de l'affection qu'ils ont pour leur patrie, encore qu'ils l'ayent abandonnee. Que si, MONSIEUR, V. A. R. fait succeder le calme de la paix aux tempestes de la guerre, la France vous eleuera par tout des superbes statues, à la baze desquelles elle grauera aussi bien que dans son cœur, les actes heroïques de vostre valeur & de vostre clemence. & ses peuples heureusement reestablis dans leur premier repos, vous reuereront à l'auenir comme le Protecteur de leur innocence, le Restaurateur de leur liberté, & le Conservateur de leurs vies. Je suis de V. A. R.

MONSIEUR,

Le tres-humble, & tres-
obeissant seruiteur,
D. P. fleur de S.